



## Međunarodna komisija za nestale Traga se za tijelima još 1.500 osoba

Analizom DNK-profila izdvojenih iz koštanih uzoraka ekshumiranih iz masovnih grobnica i poređenjem s DNK-profilima izdvojenim iz krvnih uzoraka živih članova porodica, Međunarodna komisija za nestale osobe (ICMP) je dosad utvrdila identitet 6.598 osoba nestalih padom Srebrenice u julu 1995. U saopćenju za javnost navodi se da je, u sklopu aktivnosti identifikacije žrtava, ICMP dosad prikupio

krvne uzorke od 21.566 srodnika srebreničkih žrtava. Na temelju broja krvnih uzoraka koje su porodice dale ICMP-u prilikom prijavljivanja svojih nestalih, kao i ukupne stope podudarenih DNK-profila iz koštanih i krvnih uzoraka, ICMP može podržati procjenu da je padom Srebrenice u julu 1995. nestalo oko 8.100 osoba.

“Ovo nas navodi na zaključak da treba pronaći tijela još oko 1.500 osoba. Do da-

nas, 5.564 slučaja srebreničkih žrtava su zatvorena od lokalnih sudskih patologa. Preostali slučajevi čekaju na saglasnost porodica koje su odlučile da s ukopom sačekaju dok dodatni dijelovi tijela njihovih identifikovanih srodnika budu pronađeni”, navodi se. Generalna direktorica ICMP-a Kathryn Bomberger izrazila je, u ime ICMP-a, najdublju sućut porodicama koje 11. jula ukopavaju svoje najdraže.